

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama! Poštovana braćo i sestre, draga djeco i omladino!

Uzvišeni Allah, u Kur'anu kaže: „**Onima koji vjeruju i čine dobra djela - blago njima, njih čeka divno prebivalište!**“ (Er-Ra'd; 29)

„**A oni koji vjeruju i čine dobra djela - oni su, zbilja, najbolja stvorenja.**“ (El-Bejjine; 7)

Poštovana braćo i cijenjenje sestre!

Da bi se neko smatrao **mu'minom ili vjernikom** potrebno je da vjeruje u Uzvišenog Boga, meleke, objave, poslanike, Sudnji dan i Allahovo određenje.

Da bi se neko smatrao **muslimanom** potrebno je da, pored vjerovanja u Allaha i gore navedeno, klanja namaz, posti ramazan, daje zekat i obavi hadždž, ako je u mogućnosti.

Iman (vjerovanje) i islam (practiciranje) su povezani poput tijela i duše i ispravno funkcioniraju samo ako su zajedno.

Kada Kur'an govori o onima koji praktično potvrđuju svoju vjeru onda ih definira kao one „**koji čine dobra djela**“.

Na početku sam naveo dva kur'anska ajeta, a ima ih dosta, u kojima se zajedno spominju vjerovanje i činjenje dobrih djela. I samo površno čitanje Kur'ana,

navest će nas na zaključak da ispravno vjerovanje podrazumijeva i djelovanje.

Ispravno vjerovanje u Boga ne podrazumijeva samo da čovjek racionalno, razumski prihvati da je Uzvišeni Allah Jedini Bog.

Ispravno vjerovanje podrazumijeva da se prema Uzvišenom Allahu gaje emocije, a one se uglavnom učvršćuju putem izvršavanja vjerskih obreda.

Kako čovjek da bude stalno svjestan Boga, da osjeti ljubav prema Njemu, da se osloni na Njega, da osjeti strah od Njegove kazne a zatim nadu u Njegovu milost ako ne klanja namaz, ne posti, ne daje zekat...?! A vjerovanje u Boga koje je lišeno ovih emocija nije vjera koja čovjeku daje zadovoljstvo i smirenost.

Svi Božiji poslanici imali su zadatak da potaknu ljude na **vjerovanje** ali i na **činjenje dobrih djela**. Kada bi se analizirala misija posljednjeg Allahovog poslanika, s.a.v.s., njegove hadise, vidjelo bi se da je puno više vremena Muhammed, s.a.v.s., utrošio na učenje svojih ashaba kako **da djeluju i čine dobra djela**. I ashabi su dolazili Božijem poslaniku, s.a.v.s., pa su ga pitali što trebaju uraditi da bi dospjeli u Džennet. Znali su da bez dobrih djela samo vjerovanje nije dovoljno. Zadivljujuće je kako su ashabi suštinski razumjeli vjeru. Navest ću primjer Ebu Bekra, r.a.

Jedanput je Božiji poslanik, s.a.v.s., upitao prisutne

ashabe: „*Tko je od vas jutros zapostio?*“ „*Ja*“, reče *Ebu Bekr. Poslanik, s.a.v.s., dalje upita: „Tko je pratio dženzazu?*“ „*Ja*“, reče *Ebu Bekr. „Tko je danas nahranio siromaha?*“ – upita *Poslanik, s.a.v.s. „Ja*“, reče *Ebu Bekr. „Tko je od vas danas posjetio bolesnika!*“ - dalje pita *Poslanik, s.a.v.s. „Ja*“, reče, *opet, Ebu Bekr. Na to, Poslanik, s.a.v.s., reče: „U koga se nađu ova djela u jednom danu, ući će u Džennet.*“ (Muslim)

Vidimo, poštovana braćo i sestre, način kako se zarađuje Džennet. Nije Muhammed, s.a.v.s., upitao prisutne ashabe: „*Tko od vas vjeruje u Boga?*“ (vjerovanje u Boga se podrazumijeva), ili „*Tko od vas ima dobro srce?*“ pa da mu tada obeća Džennet. Allahov poslanik, s.a.v.s., pita za djela, jer će se djela na Sudnjem danu vagati.

Dođosmo, poštovani džema'ate, do nas. Kako mi gledamo na vjeru i djelovanje?

Mnogi danas vjeru shvaćaju pogrešno. Misle da je dovoljno povjerovati a da se ništa od propisanog ne mora raditi. To su, zaista, čudni i naivni stavovi.

Kojem to poslodavcu možemo otići i reći mu da smo mu odani, a onda sjesti i čekati plaću? Zaista ni jednom. Tko misli da može, neka krajem mjeseca ode u bilo koju firmu u kojoj ne radi pa da naplati svoju dobru volju i pozitivni stav o toj firmi?

A dobra volja i dobro srce je uglavnom ono čime mnogi od nas pravdaju svoju lijenost i ne izvršavanje Allahovih naredbi. Obično takvi govore „moje srce je dobro“, „moje srce nikom zla ne misli“ i slično i na taj način hoće reći da im je to dovoljno i da za njih ne važe propisi ili da su im nepotrebni namaz, post, zekat, hadž, džamija i tako dalje.

Povrh toga, na žalost, često osuđujemo i smatramo licemjerima i prelivodama one između nas koji su smogli snage da se promijene, nešto urade, poprave stanje i svoj odnos prema Uzvišenom Allahu.

Često možemo čuti izjave tipa: „znam ja njega od ranije“, ili, „kad vidim tko sve ide u džamiju, meni se ne ide.“

Takvima i sličnima, trebamo reći da čak i da jesu u pravu, a nisu, da su onda dužni doći sa svojim dobrim srcima da oplemene džamijski prostor i postanu prvi muslimani koji će po dobri biti spominjani.

Pogrešno je zbog grijeha vjernika odricati se vjere. Pogrešno je zbog grešnog džematlije odricati se džemata. Iako vjera treba da oplemenjuje čovjeka i odvraća ga od svega ružnog, čovjek kada postane vjernik koji prakticira svoju vjeru time ne postaje bezgrješni melek. Takvi su i dalje ljudi koji mogu pogriješiti i griješe. Razlikuju se od drugih po tome što svoje grijeha prepoznaju, što im nije svejedno, što

se svojih grijeha boje, Allahu se kaju i trude otkloniti grijeha od sebe.

Argumenti o *“dobrom srcu”* ili argumenti o *pokvarenosti i licemjerstvu* onih koji se trude izvršavati naređeno, jesu samo blijedi pokušaji da se opravda vlastita lijenost i slabost imana. Bolje bi bilo razmisliti o promjeni vlastitog stanja i konačno početi raditi na sigurnijoj budućnosti kako na ovom svijetu, tako i na Ahiretu. Hvalospjevi o sebi i filozofiranje neće nam puno pomoći. Abdest, namaz, post, zekat, hadždž, sadaka, pomoć drugima, lijepa riječ... - to je ono u što ćemo uprijeti svoj pogled na Sudnjem danu i na što ćemo se, ako Bog da, moći osloniti.

Braćo i sestre, ne dozvolimo da se dovedemo u situaciju da budemo od onih koje Allah, dž.š., u Kur'anu opisuje: **„Kad nekome od njih smrt dođe, On uzvikne: „Gospodaru moj, povrati me da uradim kakvo dobro u onome što sam ostavio!“** (El-Mu'minun; 99-100)

Molim Uzvišenog Boga da nam omili i učvrsti našu vjeru, te da kao pravi vjernici, kada za to dođe vrijeme, preselimo na Ahiret!

Amin!

Split, 02.10.2015. pripremio Vahid ef. Hadžić
na osnovu rada Nevres ef. Hodžića

ISLAMSKA ZAJEDNICA U HRVATSKOJ
MEDŽLIS ISLAMSKE ZAJEDNICE SPLIT

